

涇獻詩存

涇獻文存外編卷五目錄

墓志類 二十

溫純西峯郭君墓志銘 明壽官師君墓志銘 鄭以偉牛君春宇墓志

銘 呂涇野楮君墓志銘 馬谿田楮孝子墓志銘 來陽伯段處士墓

志銘 王巖雷處士墓志銘 張縉彥王端節公墓志銘 王豐川張公

湛川墓志銘 程邑張文靖公墓志銘 張元貞趙君子安墓志銘 徐

容張公重齡墓志銘 李鎧張公九如墓志銘 喬因羽張長公墓志銘

吳偉業楊君鳳閣墓志銘 王際有楊鳳閣元配李宜人墓志銘 左文

襄徐公熙菴神道碑銘并序 吳大澂姚君玉如墓志銘 劉古愚邵卿

涂公墓志銘 賀復齋王宜人墓志銘 楊玉清子高柏君壙志

墓表類 三

方苞刑部右侍郎王公墓表

賀復齋吳君漢章墓表

李母劉孺人墓

表

涇獻文存外編卷五

墓志類

溫恭毅西峯郭君墓志銘

君諱守憲字子述號西峯世涇陽人也高祖三曾祖溫祖懷父德以君兗州績最贈文林郎推官母魏氏贈孺人生三子長守愚次守寧次君君生而英異兒時負氣八歲受書里師會涇陽荆令至同學生爭避匿君獨坐誦自如令奇之已從王生學屬文督學使楊公又奇之令藉涇庠與都御史雒公肄業學舍久之學進督學使如皋孫先生內江陰先生試列高第授廩人謂立第願屢試于鄉不第戊午且第爲其策大譏切時事不果已又從觀察喬先生談經史詩文學益進士多從之遊有成舉貢者會莊皇帝上兩宮徽號覃恩督學使鐘祥曾

君以君充貢入監時孫先生爲祭酒兩試居前擊節歎賞梓其文以傳萬曆丙子謁銓授兗州推官從御史獻獄君即連引久不決者決遣以罷御史亟稱老吏不如其釋司吏目大節郭生時登冤尤著蓋以久不第故習民情吏事故排堅理錯卽迎刃而解兗屬守令數易難其攝爭迓君君攝曹曹治攝濟寧濟寧治攝渾渾治其後守眉眉又治曹地衝民憊君爲力行雇役歲省金萬計爲後事式大司馬石公星亟稱之濟寧議門攤均驛遞修學宮建倉廩又督課諸生之尤者于君若瀛與焉其後相繼舉者甚衆鄆有稅易磚修城自君始古渠久歿于鄰豪或沮洳君復而疏之成田千餘頃又嘗監修金鄉魚台單曹隄之蓄于河者功成上錫銀幣眉故文藪也壬午無舉者君顧學宮謂泮涸非所以育蛟龍也相地得泉于郊導之入泮以其餘溉田護城又樹樹千餘以培秀氣乙

西果多舉西南田苦旱君引高堰灌數萬頃成沃壤又恤里甲正徵收蠲鹽課
諸善狀詳祭酒高公啓愚所爲碑文中先是君所至持論披心腹身任之在曹
有所忤已守眉矣猶以曹事中爲人論罷君卽浩然歸眉士民泣送有我知賢
太守誰爲惜循良之謠而去竟時曹士民號呼欲君卽守曹東昌太守則欲守
臨清又爲魯王重而禮之其爲德可知卒之所德不能勝所忤故君不免蓋今
之綜覈者類求多于舉貢爲難信易黜而令所忤陰操刺與黜之權苟善甘悅
或資高益恣睢即久之間不能掩而閭閻業已病不獨于君有慨云君生嘉靖
五年十一月六日卒萬歷二十三年二月十五日得壽七十配岳氏封孺人副
朱氏丁氏戴氏毛氏嗣男二邦教長君子取岳氏邦賓次君子諸生取劉氏又
邦相亦次君子蓋君撫而教之授以產者生男三邦屏聘諸生崔鳴鳳女邦翰

涇陽文存
聘張孕女邦藩幼女四一適禮生劉鳳竹一字余弟游擊編子見知二幼孫男
四希孔希顏希泰希儀女三一適諸生劉一化二幼葬以丙申月日墓在居口
山口向銘曰

胡玉輕售胡羽中鍛爲政魯蜀衆目則刮資不逢世市虎疇察廣嗣均產愧彼
美頡振振呱呱譬則蘭茁天道挹注徵此山北

溫希文明壽官師君墓志銘

師君諱從政字大寬別號南莊故孟店人孟店與盈村管村俱傍三原城故隸
三原三原治縣之東北偏時割而入雲陽爲縣旣雲陽廢併隸涇陽故師氏遂
爲涇陽人及君父次公又自孟店徙三原家焉三原俗相矜市布君自舞象之
年操錢千市布崛起人以君稚也爭齎子錢賈吳越往來無寧日其息倍已又

出捐子錢貨人其息亦倍久之用鹽筴賈淮揚三十年纍數萬金喜曰萬貨之情可得而觀也遂以鹽筴聽子若冢孫自歸寧次公及母劉課諸孫學書猶乘時居積于里竟老人至以計然猗頓目而有天幸當市布居闔閭有給者曰某所某急得布君即挾布往貿衆鼓掌笑也有頃持金歸衆錯愕謂命乃爾蓋君口吃在稠人中終日不吐詞不道人短長獨市利所至輻輳或舉以戒儂巧謂儂巧未必得而椎若吃得之矣自奉苦寒窶妻子僅足衣食然孝友激于義不愆事次公及母劉備極甘毳友諸弟白首翕如視諸弟之子如子有過面切輸金百助涇陽賑二百助三原城二百助清谷橋其他析券食丐施穀種葺梵宇琳官諸善狀不一涇陽三原令累多其義高給扁又以高年授階一級冠帶一着不再御曰我何以堪里中人以是益高之余讀太史遷貨殖傳無慮數千

萬言大都津津乎賤徵貴貴徵賤與夫貪賈三廉賈五之說而無有一言及命以約熙熙攘攘者謂垂戒何余惟師君之椎而吃也竟起家至數萬蓋賈亦有莫之致而至者儼巧何爲抑孝行質行造物亦默相之耶余辱葭莩知君而張生伋狀亦云故志之以補太史遷之缺君生正德己卯月日卒萬歷丙申月日得壽七十有七君高祖諱文秀生恕恕生孝孝配王氏生二子長虎次仲芳號壽軒卽次公君父也母劉氏次公有四子而長者卽君配党氏生子男二長鳴鳳取張氏次鳴鵬取杜氏女一孫男六曾孫男四女二銘曰

惟周師尹作國之翰以昌厥後爲氏以官漢有師史郡國轉轂致七千萬史氏侈錄君豈其裔以賈起家委命篤行寧質母華而後繩繩以引勿替我銘罔泐永爲世勵

鄭以偉牛公春字暨于淑人墓誌銘

北戒河源自北首循雍北徼達華陰與地脉會並行東至太行東流與八水相表裏結爲天府歷代都焉王霸氣歇餘靈鬱勃不散猶鍾爲宋關學我明之名公卿以予景仰如魏恭襄不及快覩所撫塵遊者如馮恭定覺橫渠去人不遠然當定陵妖書事起賴廷尉牛公春字爭之上採其言保全善類無限而牛公心印恭襄伯仲公定位不配德乃其立朝正眞忠厚平居講學發爲譔述與西銘正蒙並垂日星天下雖惜其未盡用而其所以用之學尙可見於立言間公雖不能盡用其學而用之廷尉足以長我王國僅拜少司寇則天也妖書者一妄言男子匿名言事今不復知何等語不過慮國本如憂危宏議之流已耳卽達之御覽請付丙丁已畢矣無奈鬼神興怒大索百餘日了不可得緹騎操刺

批引述江夏郭文毅公之舟盡反接其臧獲拷掠之卒不可得未已也臺諫某
某又以此領次輔歸德上不之信下其章謂非所宜言不深罪也金吾捕噉生
光廷鞫命司禮陳棨蒞之生光自承體無完膚但稱死罪終不言主使名三問
如初少宗伯晉江李文節語少司寇樂安董公曰獄懼囚不承承何求焉力言
宜坐勿宅及御史湯公兆京沈公裕和之公方爲廷尉故事司寇決獄必廷尉
議乃讞使公一語少飭滋蔓矣公指頭上曰天鑒在茲勿波無辜應元一日在
廷尉此獄無蔓理陳棨喜曰朝廷有人獄成事乃解夫生光寧自承不以戕善
類亦貫高之流亞哉顧非諸君子爭無以勝阿附者之深入非公之矢天則諸
君子之勢孤而無以伏射墉者之心或曰生光未必辜如殺匹夫無罪何是不
然深入者即推主使生光免乎是生光以死代善類而諸君子死一願死之生

光而生衆不生之大臣也所全國體孰多當是時牛大理之名真不愧于定國
矣公諱應元字兆坤號春宇國初諱彥名者避兵自姑蘇占籍涇陽之千夫里
生大生二生三惟二相承世曰全曰通曰省祭公隆而省祭公配張舉四子其
次曰璠是爲贈公娶翟無出子娣之子應魁庶李舉伯子應宿繼室王生子二
長卽公次應麟公在姪母王夢月墜懷驚而寤告贈公贈公喜曰是貴徵公生
穎秀入塾日誦千言督學曾閱其牘稱公輔器補博士弟子贈公少習儒以貧
爲郡公曹稱文無害主唐縣簿罷獨心奇公曰是能去吏仕而儒者耶我先世
積德不耀耀之其子乎顧我老不見耳不然爾母夢維何公聞之學益勵會贈
公捐館哀毀逾禮丙子舉於鄉聯登進士受光山令首行條鞭法淫賦以田斷
征輸以季限修義倉積穀得六千八百石奇光貢葛始萬歷十三年計百疋民

率逃去公申請機匠佑直貸官膝給織自解價省十分之七河溢臺檄派草五萬餘束束重二十斤脚力用騾四萬蹄車萬輛公條利害得減三分之二且量脚價令近買納新文廟士爲不變禱霖輒應民以爲牛公雨因雨沾濬淺灘以通糴米從淮汝抵城東價頓平宅若減贖緩絕羨餘請建驛善政不可勝紀己丑奉召老穉遮留五宿始得出境拜四川道御史巡東城聽斷得情輦下人多憫東城屋就理辛卯差視兩浙鹺擊貪墨一運長兩太守疏入太宰餘姚孫公曰是非向所交章薦之者哉視鹺能直糴避眞鐵面也及瓜核額外積貯贖錢數千報部以濟國用筭無長物復命回道時寧夏唃拜亂內則儲位未建外則斥臣未用公各疏言之又大臣去就匪輕一疏不憚侃切癸巳按淮陽條泗徐宿水患及保祖陵安餉道糾正總河因循與劾罷長吏知府吳某喬某馬某

越奏知縣毆陽某又繪河中央圖以進定陵震怒切責總河罷職去用河工報竣
賜金入都借遷葬歸省母而母先逝矣奉諱幾不欲生服闋除河南道有會推
大典敬陳一得以裨治平之疏已亥按應天有程守訓者依權朮諸璫以噉富
室公繩之以法嗣是章無一歲不上皆有關河工國是而紂陳奉匿賊又効邊
功鋪張多觸時忌不恤也屢奉俞旨而最鉅者請存建文年號附紀高帝末天
下戇之歸德獨禮重公與商確未嘗不稱善曰牛君匪獨風裁亦朝之八柱矣
甲辰擢大理寺右寺丞尋轉左丁未擢右少卿尋轉左楚宗有訐楚王非種者
郭文毅請楚撫勘公曰勘之便當軸者曰親王無勘法體訪之便下廷議大臣
議有右王者餘漫無可否再奉議人持一牘而公守前議已不能不忤於時矣
無何又議妖書事於是公之身如秋葉之附危枝焉戊申晉都察院僉都巡撫

南贛抵虔首詢疾苦清邪正裁供億恤軍伍禁苞苴稽章貢稅稱姪武備歷四
品俸再考乃銜公不揄揚者爲蜚條中公於南省及都門不受偶有不察者入
其數中疏微侵公賴閣部夙亮公才品而臺省相與駁正言者卒用例去公論
在人心如此公疏休澣不允癸丑始俞去贛之口積貯橋稅銀數萬封置庫中
充軍儲歸里撫按臺諫交章數十上壬戌春起南大理寺卿平反庶獄大都如
北少卿時癸亥擢刑部右侍郎適有言公龍鍾者輒辭溫旨慰留有素稱亮直
之語俄遷刑部左侍郎終思退白駒不復可挽矣三乞骸骨不允不得已拜疏
出城上知不可奪詔回籍調理而猶候痊起用郭文毅謂公功在社稷不可泯
孫莊毅則曰牛君居恆恂恂一遇大建白大利害挺然以身當之勇於孟莊陶
石簣每云若牛公真知大臣體矣先是光有產於郊者身醫蹄馬尾牛雷雨隨

之動林木簿畫圖欲上聞公獨曰不可亡何內璫自南還以圖進上責部使者
公上牘曰帝王以民和歲豐爲瑞瑞寧在此部使以牘疏大宗伯元輔咸如公
言上知無足異第取其革獻皇太后藏之宮內而已識者已知令有大臣風焉
迨殺摠竊權附之者幾搆白馬清流之禍而公超然罟網之外非知幾者能如
是乎然使在言路者皆如公則可以止妖書之蔓亦可以救楊左諸人之慘惜
其不在朝耳公少苦痰能簡方書自救忽一疾不起撫按方奏公宜大用而公
不及待矣公在光作質言以訓士在贛日與諸生譚道人謂文成再見按浙直
所得士後多名卿人又謂公宋宣和殿中玉等子也歸作四書會真錄構一樓
藏書題曰游藝公兄弟華首同居居鄉誨止人訟施予遍九族而一方利害必
以告有司歲侵盜起倡賑弭之獨不屑屑詒子孫曰吾恐其愚之耳太史公曰

恭定之學以持敬爲主得紫陽之嫡傳其學實牛公雖不泥紫陽間收象山白沙文成以極其高明其學弘乃其不雜於二氏百家則水乳合也然公出魏恭襄門其遺言發魏所未發則黃出於土而黃於土矣元配于淑人貞靜簡默與共約素善事姑撫諸子女有鳴鳩之平遇姻戚妯娌委婉欵洽御臧獲婢妾則恩義兼至卒於留都官邸公偕其襯以歸副配賈氏鄧氏子一象炳以公廕任銘曰晬盤示兒百物取正蒙諸篇星之斗質言會真名理藪五百餘年若符湊問誰著者惟司寇前張後牛關學茂司寇牛父微子後隴西遷涇綰墨綬佛母乳灑千子口朝入柏臺章夕奏帝畀汝斧代予狩灑波利普河偃溜棘庭晉陟佐在宥靈場書威羣妖嘯人頭羅剎箝網搆廷蔚矢天曰否否飛患以息聖德厚保釐虎頭民若穀長流初拜臣敢逗一語不亮遂拂袖惠牧轡轡麟不囿乃